



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda in Scholis Medicorum, die Jovis decimo-septimo
mensis Decembris, anno Domini M. DCC. L.*

M. FRANCISCO THIERY, Doctore Medico,
Præfide.

An præter genitalia Sexus inter se discrepent?

I.



ENERATIONIS, quâ nihil in rerum naturâ frequentius & abstrusius, non una ac eadem via est: aliquando absque Sexu, ut in productione plantarum per taleolas, polyporum per sectiones, solemne est fieri generationes; & in multis animantium generibus, præsertim in iis quæ vitam immobilem agunt, nullum omnino Sexus reperies discrimen; frequentius tamen in vegetantibus animantibusque requiritur Sexus: masculus qui in alio generat, alter qui in seipso femininus. Utriusque autem modus & usus differunt. Brutis coeundi tempus anni definitum, homini nullum; quædam species abs-

A

que coitu generant, ut pisces; in nonnullis, individua Sexu utroque simul donantur; ut plurimi vermes, testacea quædam, vegetantium maxima pars; quadrupedibus vero, piscibus, volucris, & reptilibus unus cuique individuo Sexus est; nec inter homines fuisse, qui ambiguo sexu donarentur, certâ unquam (a) observatione constitit; sed vetustissima hermaphroditorum opinioni ansam dedit, nymphæ colem æmulantis excessus. Vidimus & ipsi paucis abhinc annis puellam septennem, quæ deinde fere pubes, Urbi spectaculo fuit; clitoridis grandiori mole, puerum suæ ætatis adeo mentiens, etiam superans, ut androgynen renunciaverint omnes, præter Anatomicos. Cur aliquando in naturâ absque Sexu, sæpius utriusque operâ, fiant generationes, satis aptè ex diversitate fabricæ organicæ explicabis: hæc ubi in nonnullis corporibus organicis simplicissima est, pars quæque toto similis, per debitam evolutionem corpus efficit, non ab simile ei à quo exsecta est; in plerisque autem aliis magis composita, feminis, adeoque Sexûs exigat necessitatem. Cur verò individuorum utroque Sexu simul instructorum duplex copula, cur & in his quæ unico tantum gaudent collata Sexuum requiratur opera, nec ex solo femine masculo mares, ex feminino femellæ producantur, huc usque physica latuit ratio. Sexuum porro institutio multa posuit in animantibus discrimina, diversa pro diversis genere & specie, quorum alia ipsamet generationis organa hic consultò prætermittenda, alia Sexuum generaliores usus spectant. In specie humanâ, pectinis os feminis recurvatum magis in exteriora quàm viris, ossa ilium magis ad latera reflexa, latioraque, tum os sacrum longius, antrosum minus flexum, tum coccyx rectior, lumborumque vertebræ retrorsum magis declinantes, efficiunt ut pelvis muliebris, omni dimensione, virili capacior sit: inde utero, fetuique enormi mole adaugendis, amplum paratur spatium; nec obsistunt aliunde mollia circumfusa, intestinum rectum, & vesica, quæ sensim expansa, cum uterus inanis est, & inde maiora quàm in viris, excrementa diutius retinendi feminis dant facultatem. Latiores autem pelvis, & augescens in graviditate abdomen idè firmitus sustinentur, quòd femoris & coxæ articulatione rectiorem cum trunco angulum efformet in mulieribus quàm in viris. Præterea in illis coccyx mobilior, si antrosum vertitur, fetum sustinet, si retrorsum, favet enitentibus: sed & ossis sacri cum ossibus ilium commissura debilior est; præcipuè ossa pubis breviori lineâ & molliori cartilagine inter se committuntur, quæ propterea in enixu aliquando (b) disjungi observatis constitit. Infimæ autem partes sub osmium pubis connexu, cum magis à se invicem distent, ischiique spina antrosum reflectatur, ex pelvi, ad fetum excludendum, exitus in feminis amplior est. Viviparis porro animantibus, debilem fetum, primis à partu temporibus nutriendi commissum officium, mammarum fecit necessitatem; quæ brutis ventri potissimum subjacent, homini pectori assignantur: idè mulieribus thorax anteriori parte planior est, claviculæ minus curvæ, quàm viris; in his adumbrari tantum mammas dixeris, cum exsuccæ, rarissimè lac fundere visæ sint. Verum, ut feminis major pelvis capacitas, sic masculis thoracis dimensio amplior; quod fere de omni genere viviparorum dicendum est: latiores ergo viri supremâ thoracis parte, coxis angustiores; contrâ mulieres. Demum sternum quod viris longius, mulieribus brevius est, his abdominis longitudinem adauget, minuit illis. An & feminis costæ mobiliores? certè viri abdomine, feminæ thorace præsertim respirare (c) observantur: inde securitati earum provisum est, graviditatis enim tempore, repleto distentoque abdomine, septum in pectus repulsim difficillimè contrahitur, & respiratio è solo thorace feminis tunc, fere superest. Imberbis facies cum uberum prominentiâ facilem & expeditam facit muliebris Sexûs à virili distinctionem, etiam sine diversis vestibus aspectabilem. Nonne alia inter Sexus veniunt discrimina? contextum partium, temperaturam dissimilem, proinde actiones vitæ, proprietatesque Sexibus diversas inesse credimus; quæ quidem ex uno & eodem naturæ systemate emanare videntur.

(a) Theodor.
Tzouchin. Dis-
sert. de Nym-
phæ prædis.
Boerth. 1730.

(b) Riolan.
Anthropog.
Lib. VI. cap.
12.

(c) Boerth.
Comment.
Initiur. n°.
623.

QUI Sexus inter se non differre exinde putaverit, quòd organa præter ea quæ generationi dicantur, eadem numero & situ paria utrique concessa sint; ille nec hominum, nec animantium ejusdem speciei, in diversis regionibus, miram varietatem perpexit; nec individui ejusdem, pro variâ ætate, rerum non naturalium usu, prosperâ vel adversâ valetudine, manifestum à seipso discrimen. Molli, delicato hominioni eadem ac athletæ viscera sunt: fatuo & sapienti, non alia cerebri, non alia sensuum organorum structura. Quantum tamen hi & illi inter se discrepant! Itaque ut in animantium familiis stupenda diversitas, sic in speciebus infinitâ propemodum diversitatis. Ex dissimili prorsus fabricâ generum distinctio; ex similibus organorum variâ constitutione specierum & individuorum discrepantiæ. Et primo quidem, organorum elementum fibra est, quæ variè tensa, laxave, solidior, vel tenerior, dissimiles edit effectus; at organa se habent ut fibræ; actiones porro ut instrumenta à quibus producuntur. Deinde singulorum membrorum, innumeris modis variare potest conformatio exterior, magnitudo, moles, mutua inter sese proportio, eadem remanente structurâ: hinc innumera discrimina. Sic ex cordis molis, respectu totius corporis, proportionem adauctâ, majus inde accedere robor: ex crassioribus ossibus, quibus majores sint eminentiæ, firmiores articulos, validiorem reddi actionem muscularem, demonstrant Physiologi; & sic porro de cæteris. Specierum ergo discrimina indicant, modò partium exacta distinctio; modò vitæ actiones, motus, sensus, respiratio, vox, gestus, mores & affectiones, valetudo, vitæ brevitatis, prolixitas, &c. modò signa externa, tum universi corporis, tum singulorum partium. Pili rigidi, densi, plurimi, collum crassum, vastum caput, quæ in robustissimis animantibus adsunt, eadem in hominibus fortitudinis signa sunt: cutis nigrior, hirsuta pilis, progrediente ætate calvities, latissimus thorax, venæ amplæ, arteriæ vehementius pulsantes, musculosum corpus, nec pingue, nec gracile, firmissimam constitutionem significant; contraria imbecillum, &c. Hæc porro omnia mutuo sese confirmant: interiora corporis, externis, ut plurimum, respondent; mirâque animalium fabricâ, partium interiorum determinata vis, certam in exterioribus producit conformationem: animi pathemata & propensiones, corporis diatheses, sese vicissim designant, & mutuo producant; cum mores sequantur temperamentum corporis. Verum inter animantium genera, ex homine longè major signorum numerus colligitur; quandoquidem illi habitus spectabilior, corpus pluribus actionibus aptius, vultus denique, ubi animus fere inhabitat, mentis affectionibus prope omnibus indicandis est habilissimus. Hinc ars Physiognomonix, quæ suis si circumscribitur finibus, non incerta adeò spernendave; hinc temperamentorum doctrina, quæ bene percepta, sanandi artis firmissimum est fundamentum. His principiis accuratè insistentes, æconomiam animalem utriusque Sexus, si investigaveris, haud pauca, nec ad praxin inutilia reperies discrimina, quorum summa satis erit hic attingisse.

I I I.

VIRILEM perlustranti Sexum occurrunt tibi, cutis densior, durior, hirsuta pilis plurimis, crassis, ut plurimum nigrioribus; distentæ venæ; quadrati muscoli, tendinibus instructi validioribus; crassiora ossa, eminentiis asperiora; artuum firmior compages; oris, totiusque corporis duriora apparent lineamenta. Contrâ mulieribus mollior cutis & candidior; pilus tenuior, rarior & splendidior; vix apparent venæ; tenerrimæ adsunt carnes; exiliora & planiora ossa; crassiora genua, pedes elegantiores; artuum omnium tractus leviores, magisque expoliti: ut jam ad virile corpus robur & dignitas, ad muliebrem lepos & venustas cum quâdam debilitate, pertinere videantur. Membrana deinde cellularis, præcipuè quæ cuti subjicitur, viris strictior macriorque, eadem feminis laxa magis & turgens pinguedine, vasa cutanea comprimit. Hinc illis uberior perspiratio, his autem parcellissima, simul & minus acris, ut potè leniori temperata oleo; unde halitus puellarum ad senilem tardandam ariditatem, (a) Maximi fit mo-

(a) Regum I. 13
III. cap. I.

menti. Hinc etiam leviores jacturas patiens, & excrementis abundans muliebri corpus, longarum inediaum, præ virili, longè frequentius (b) celebra dedit exempla. Porro thorax amplior in masculo Sexu [Sect. I.] quàm in feminino, insigne ponit in æconomia utriusque discrimen; cum pectoris cavitati pulmonis respondeat volumen, hic autem præcipuum sit vitæ organum. Musculi præterea viris crassiores quàm mulieribus, validiorem illis esse actionem muscularem evincunt, aliis siquidem paribus, vis muscularum ex ipsorum mole æstimanda. Verum ventriculus, intestina, musculi sunt; respiratio, loquela, &c. sunt ope musculorum; adeoque viris ciborum major appetitus, concoctio facilior, vox gravior & fortior, &c. Cor ipsum, animalis machinæ primum mobile, musculus est, quem diversæ molis esse in utroque Sexu, diligentissimam (c) observata docuere; proportio enim ponderis cordis (detractâ pinguedine) totius corporis respectu minor est in animalibus pinguioribus quàm macilentis; at femina viris pinguiores: & in universum ea proportio major est in animalibus masculis quàm femellis, cicuratis ferisve. Quapropter humorum motus & quæ ex eo pendunt secretio, excretio, &c. viris validius perfiuntur; » viri mulieribus (d) » pulsum fere habent longè tum majorem, tum vehementiorem, tardiorum simul, » diastolis tamen extensoris «: contra proportio molis hepatis, respectu cordis & corporis, major est in feminis quàm maribus; augetur siquidem jecinoris pondus eâ ratione quâ cordis pondus minuitur & vicissim: concurret aliunde textum cellulare plenius in feminis; cum, ex humorum affinitate, cellulosum systema hepatisque volumen, pari ratione, (quæcumque sit), augeri simul minuique videantur. Inde phænomena explicabis; cur ventriculus (e) minor mulieribus; cur hepatis affectiones & aqua intercus iis frequentissima; cur respiratio difficilior; cur tandem modica sitis, & appetitus languidior qui acribus & insolitis sit excitandus. Hæc autem confirmant quæ & in bruis tibi notanda veniunt sexuum discrimina; marium scilicet carnes duriores, femellarum teneriores, ipsis coquis est notissimum; tum varias animantium partes, diversas, pro diverso Sexu, ad Medicos usus (f) exhibere facultates, Medicorum filii te edocebunt: deinde in omnibus fere animalibus femellas voce tenuiori & acutiori dignosces, masculos fortiori, collo insuper & capite amplioribus; præterea partibus quas ut arma natura dedit, quales sunt dentes exerti, cornua, calcaria, &c. iis feminas omnino destitui reperiēs, vel si utrique concessa Sexui, maribus hæc omnia potiora (g) & robustiora adesse; & ferarum feminas ad homines facilius assuescere videbis (h) & mansuescieri, certo indicio, quod ut corpore, sic animo, maribus sint molliores. Dissimilem verò exigebat in corpore feminino temperiem fetus nutritio; laxata nempe solidorum compage, minutis inde humorum motu & secretionibus, matri arcescenda erat plethora, quæ porro ad uterum præcipue ducenda erat. Inde dispar in utroque Sexu vasorum apparatus, hic non prætermittendus. In genere arteriosum systema laxius est feminis quàm maribus, venosum autem non eadem proportionem (i) debilius in illis; venosum proinde systema magis repletur maribus, arteriosum feminis; quod ex arteriis catamenia sruant, lymphæ in utero fetum nutriendæ, lac exsudet in mammis. Deinde aortæ descendens truncus, respectu ascendens, amplior feminis quàm maribus, illisque magis ad iliacam regionem, utpotè debilior, dilatatur, à quo aliunde ibi majores oriuntur rami & numerosiores: at feminis venæ majores crassitie eò strictiores, ac numero pauciores, quod pelvi viciniores sunt: quapropter copioso semper sanguine turgens uterus, cum majori ipsi quantitate afflatur per arterias, difficiliori revehatur per venas. Eò demum spectant, vasorum uteri, inter se, cum hæmorrhoidalibus, iliacis, femoralibus communicatio; valvularum defectus in venis sanguinem ad perpendicularum reducentibus; arteriarum serpentinus ductus, quæ præterea ore patulo hiant per villos exhalantes uteri, vel in ejusdem sinus mucosos. Ergo in uterinæ plethoræ, quæ necessaria fuit, gratiam, partibus abdominalibus major concessa fuit laxitas; hæc deinde in universum corpus similem induxit dispositionem,

(b) Comment. Nonon. Scient. & nat. Infit. & Acad. Tom. II. part. 1. p. 222.

(c) Bryon. Robinson, experim. de animalibus observ. 3. 4.

(d) Galen. de casibus pulsum Lib. III. cap. 2.

(e) Heister. compend. Anatomie. n.º. 209.

(f) Galen. de simplicibus Medicamentis. Diacord. de Mater. Medic. passim.

(g) Asifot. Fittor. Animal Lib. IV. cap. ult. (h) Idem de Phisognomon. cap. 5.

(i) Clifton Witringsh. apud. Haller. Commentar. Inutur. Boerh. n.º. 661. n.º.

ne mutata nimis, partium inter se convenientiâ, muliebris œconomia læderetur. Ex-
 cluso fetu, constricto utero, plethoram ad mammas ferri exigebat earum [Sect. I.]
 usus. Hinc mirus ille uteri & mammarum consensus; quem tamen nec vasorum mam-
 mearum cum epigastricis evidenter in feminis communicatio, nec nervorum com-
 mercium, nec utriusque partis liber à compressione situs, vix sufficienter explicant,
 quamvis ultima ratio probabilior utcumque videatur. Hæc porro ut plurimum in
 brutorum semellis conspicua, in muliere tamen conspectiora, dissolvendis satis sunt
 his quæstionibus; cur minus sanguinis extremis corporis feminarum partibus, inte-
 rioribus verò magis continetur; cur in quadrupedibus viviparis partes superiores &
 anteriores maribus validiores & aptiores, feminis (*k*) contra inferiores posterioremque;
 cur omnium feminarum mulier sanguine maximè abundat; cur doloribus gravanti-
 bus præ viris magis obnoxia; cur illi crassiora femora; cur venæ sectiones & enormes
 hæmorrhagias absque vitæ, & fere valetudinis periculo, sæpius mulieres patiuntur;
 cur puellis peculiaris morbus chlorosis: hinc etiam eorum ratio patet quæ in practi-
 cis observabis; in universum virilia corpora frequentius & vehementius acutis morbis
 corripì deprehendes; feminina chronicis & periodicis ut magis obnoxia videbis,
 sic celeres morbos mitiores plerumque experiri. Viris magnæ & subite valetudinis
 mutationes magis familiares; sponte siquidem ad athleticam constitutionem vergunt,
 quæ valde (*l*) lubrica est.

(*k*) Aristot.
 Histor. Ani-
 mal. Lib. IV.
 cap. XI.

(*l*) Hippo-
 crat. Aphor.
 3. Sect. I.

I V.

SEXUUM diversa temperies, virumque vitæ [Sect. III.] inæquale momentum,
 alia in corporibus circa nutritionem & accretionem fecere discrimina. Jam mas-
 culos citius in utero coagmentari, triginta scilicet diebus, feminas quadraginta-duo-
 bus, quòd ipsis ab initio principiorum diversa vis insit, divus senex (*a*) memoriæ
 tradidit: ubi verò in lucem editi sunt fetus, puellæ citius quàm pueri crescunt, pu-
 bescent, sapiunt; tenera siquidem laxiorque compages, hinc inde tota explicabilis,
 facilius recipit nutrimentum, quod præterea minùs consumitur, & minori massæ di-
 stribuitur. Eadem corporis mollities debitam membris flexibilitatem diutius servat,
 & senilem quâ tandem obimus, ariditatem moratur. Inde mulieres, si tamen men-
 struæ cessationis, (quæ plurimas jugulat) periculum vitaverint, viris sunt longævio-
 res; cujus rei veritatem, contra antiquorum sententiam, stabilivit recentiorum (*b*)
 observatio; inde etiam mulieri, secus ac viro, caput tristi non deturpatur calvitie;
 senescere autem feminis minùs incommodum, quòd breviori corpore (*c*) sint. Mas-
 culis enim statura eminentior, constanti satis lege, quæ etiam in quadrupedibus san-
 guineis viviparis, fere perpetua est: an quòd debiliore Sexui proceritas eadem ac ro-
 busto inutilis, imò gravior? an ita naturæ visum augmento muliebri limites pone-
 re, quò citius edendæ proli forent aptiores? quippe iis generandi ad quadraginta-
 quinque, vel ad summum quinquaginta annos cessatabilitas, quæ viris vis agnoscit
 terminos. Quâ ratione autem accidat staturæ discrimen, illud [ex Sect. III.] me-
 chanicè explicabis. Ossium volumine corporis moles circumscribitur, ut si crescere de-
 sinant, jam universi corporis cesset accretio: causa verò in ossium penetralia fluida
 impellens, vis est cordis: hæc si resistentiis major est, corporis fit augmentum; si
 equalis, nutritio; si minor, decrementum: porro proportio molis, & proinde virium
 cordis, totius corporis respectu, minor est in feminis quàm in viris, cum aliunde
 major sit sanguinis movendi quantitas; adeoque citius in illis librantur vires cordis &
 resistentiæ. Deinde ossium præcipuum elementum, terrecum illud est, ut demonstrat
 analysis; particulas autem crassas & terrestres feminarum humoribus pauciori quantitate
 adesse, evincit virium, per quas fit concoctio minor in ipsis potentia; & si aliquando
 ex alimentis crassiores extractæ fuerint moleculæ, harum, propter vasculosi systematis
 inertiam, difficilis ut erit assimilatio, ita citius è corpore sub urinarum præsertim for-
 mâ secedent; ideo mulieribus uriquæ magis quàm viris crassæ & turbulente; propterea

(*a*) Idem de
 Natur. pueri
 Sect. X. seq.
 de Genitur.
 Sect. VI.

(*b*) De Par-
 citate, Essai
 sur les proba-
 bilités de la
 durée de la
 vie humaine.

(*c*) Hippocr.
 Aphor. 34.
 Sect. II.

(d) Idem.
Aphor. 29.
Sect. VI.

etiam vix unquam podagrâ (d) tentatur femineus Sexus; & inter alias rationes, urethrae scilicet ampliacionem & brevitatem, calculo longè rariùs vexatur quàm virilis. Hæc confirmant bajulorum & rusticorum corpora quibus, cùm duros & terrestres assument cibos & concoquant, ossa fiunt longè quàm urbanis ampliôrâ. Ossium igitur in unâquaque dimensione feminis minuitur volumen, & aliquando numerus, iplis siquidem ultimæ molares dentes sæpius quàm viris delicere observantur. Staturâ muliebri minuendâ præterea concurrit tunica cellulosa, uteri, mammarumque valde explicabilis fabrica. Quippe accretio, cæteris paribus, ex quantitate liquidi appulsi æstimanda. Jam verò quòd systēma cellulosum laxius sit feminis, humorum qui in his lentè moventur, perpetua exinde fit in cellulas derivatio, & affluxus: unde augmentum in latitudinem; adeò ut obesa corpora macilentis in genere minùs excrecant in longitudinem. Deinde cùm arteriæ hypogastricæ, tum numero, tum diametro, majores sint feminis quàm viris, & menses ante finem incrementi plerumque erumpant; liquor vitalis minori copiâ per arteriam cruralem, artus inferiores aluit, qui idèò minùs crescant; exemplo fetus cui minimi sunt hi ipsi artus, quòd ab arteriis cruralibus descedens sanguis ferè totus in umbilicales deferatur; citissimum verò incrementum recipiunt, ubi oclusis iisdem umbilicalibus, crurales debitum accipiunt sanguinem. Præterea eodem fere tempore, quo menstrua mulieribus erumpunt, iisdem fororiantur mammae: porro arteriæ mammariæ præcipuè ex subclaviâ & axillari ducunt originem, ut idèò quantitas sanguinis dilatandis mammis inserviens, eadem artubus subripiatur superioribus. Demum aorta ascendens densior & strictior feminis est, inferior autem laxa & ampla magis: quapropter sanguinis copia minor in ascendentes aortæ ramos advehitur. Reipsâ feminis collum subtilius; larynx minor, thyroïdes cartilago, ut tenuior, minùs protuberat; facies angustior; cerebrum & caput minora sunt. Ex prædictis sequitur, cæteris paribus, eò proceriorem fore mulieribus staturam, quòd tardior, pauciorque humorum fiet ad uterum & mammæ derivatio: hinc justæ & concinnæ corporis magnitudini illæ optimè consulunt, quæ nonnisi post debitam accretionem, octodecim scilicet vel viginti annos, graviditatis & puerperii adiuvant pericula. Musculos exiliore feminis [Sect. III.] diximus: an quòd minori constent fibrarum numero? obstant ne credamus tum actio muscularis si debilior, attamen æquè varia ac in maribus, imo agilior: tum musculorum molis, pro diverso nutritionis statu, in eodem individuo, enormis sæpius spectanda differentia: an potius fibræ musculosæ tenuiores mulieribus, viris crassiores? crassitiem non differre suadet Myselii & Læwenhoekii (e) microscopium, quo in animantium diversæ molis & speciei, quadrupedum, avium, piscium, corporibus, ultimæ fibræ longæ, mole vel crassitudine propemodùm æquales apparent. Omne itaque discrimen ex telâ cellulosa contingere credere est, quæ viris densior & crassior membranarum ratione, minimè verò cellularum, dum musculorum fasciculos colligit, & fibras singulas comitatur, musculosam adauget carnem, roboratque; sententiam confirmant telæ cellularis usus & història; crassa siquidem & callosa membris exercitatis, vel robustis, eadem debilioribus tenuior est & delicatior. Fibræ itaque longæ, æquales in utroque Sexu numero & crassitie, tunicâ quâ includuntur longè dispares sunt. Ex vaginæ densitate fibrosum systēma viris firmum ac robustum redditur: inde idæa lentiores, sed tenaces; sensus hebetior, ac animus constans: contrâ involucri tenuitas efficit ut feminis fibra imbecillior, nudiorque, stimulis internis externisve moveatur, qui virilem fibrâ possent lacerare; quapropter Sexui muliebri, præ masculino *irritabilitas* major & *sensibilitas*; mobilius inde genus nervosum, vibrantiores & micantiores oculi, vividiores idæa, promptior inaginatō, sensus acerrimi, major ab externis passio, ad convulsiones & lipothymiam proclivitas: proinde ut viros vexat melancholia, ita feminas hysterica passio; quos totâ naturâ differre morbos contra Sydenhamum contendimus. Non obstat autem laxitati muliebris fibræ ejusdem *irritabilitatem*, suadet convalescē-

(e) Læwenhoek. Epist. Physiol. puls. sm. Myusius de carne Musculos. p. 426.

centium & phthisicorum exemplum, quibus dum vis muscularis minima est, sensus adest exquisitissimus, adeo ut ingenii acumen, & corporis robur inversâ ratione crescere ac decrefcere videantur.

V.

PROPOSITA porro [Sect. III. & IV.] Sexuum discrimina à solâ pendere consuetudine & educatione, multi existimant: molliori quidem vitâ otiosâque foveri *femineitatem*, durâ autem & exercitatâ virilitatem augeri non inficias ibis; attamen in his agnoscere debes naturâ institutum. Jam enim in omnibus locis temporibusque constans utriusque Sexûs longè dispar educatio, generalissimam supponit in humanâ specie consuetudinem, quæ probè intellecta ad hominum originem te reducet, aded- què ad ipsammet naturam: nec te movebunt Amazonidum raræ & incertæ historiæ, præsertim cùm earum, si unquam fuerint cœtus, omnino viris caruisse, nondum apud (a) eruditos constiterit. Viros deinde aspice urbanos, otiosos, ut ab exercitissimis mulieribus rusticis adhuc dissimiles, universo corporis habitu sexum exhibent vi- rilem! Demum in brutis similia plus minusve, præsertim in viviparis, tibi occurrunt discrimina, quibus tamen eadem vivendi norma, eadem exercitii videtur ratio. An sexuum discrepantia [præter Sect. I.] à femine, quod in masculis vividius, & certè co- piofius (magis enim coitû debilitantur quàm femina) dum perpetuè reforbetur, & humoribus permiscetur, phenomena relata [Sect. III. & IV.] producit? Reverà cùm formatur semen, erumpere barbani, mutari vocem ex acutâ in graviolem & asperio- rem, roborari juvenes, mariumque carnes nescio quid spirare virofum, omnibus notum est: præterea eunuchis, si puerili ætate castrantur, (b) vox acuta remanet, neque oriun- tur pili, qui nobis natis postea provenire consuevere, calvities & podagra non acce- dunt, nec (c) latæ venæ sunt, nec sanguis floridus, & arteriæ parum & imbecilliùs pulsant; certo argumeto totum corpus à testibus alterari. Si tamen castratorum cor- pora attentè perlustras, non omnino, præsertim magnitudinis ratione, feminina repe- ries, sed mediam, ut ita dicam, inter Sexum utrumque servare proportionem. Quid si ante feminis formationem pueri, imo ante ortum fetus, Sexum suum indicant? quippe mares citiùs, frequentius, validiùsque in utero (d) moventur; ergastula sol- vere maturius gestiunt: ut inde mares, potiùs quàm feminas, oblatos mutilosve, in genere hominum nasci (e) observatum sit: præterea mulier si marent concepit, benè colorata est; si verò feminam, (f) sæpius decolor, infirmiorisque valitudinis: fetus mares in dextris, utpotè validioribus partibus, feminas in uteri sinistris (g) ut plurimùm geri: illos crescente & vigente lunâ sæpius, has potiùs decrefcente nasci; quòd conceptio & partus, similibus respondeant lunæ periodis, vulgaris, parum adhuc liquida, præcrebuit opinio. Si verò hæc omnia cum feminis historiâ & usu probè conseras, & simul atten- das, adolescentes inter se, vel senes cum juvenculis, si rem habent, potiùsimum ge- nerare semellas, ætate confistentes masculos: quæ spontè concipere nequeunt mulie- res, eas si artis auxilio conceperint, feminam magnâ ex parte parere (h) potiùs quàm marem: in humanâ specie prolem geminam similis Sexûs frequentius edi quàm dissi- milis; & paucos geminos servari (i) si alter mas sit, alter femina: austrinis flantibus ventis feminas in brutis, aquilonis autem mares (l) potiùs concipi: in hisce septentrio- nalibus plagis, quippe humana gens robustior est, pueros nasci, qui puellarum nascen- tium numerum fere quadragesimâ parte superent, quod certissimis observatis constat: contrâ in meridionalibus, ut viatores narrant, femininos fetus, masculinis frequen- tiores esse: ex his omnibus non absurdum aded consequetur, illud veteris sapientiæ (m) effatum, quod jam in quadrupedibus singulâ vice feturam unam edentibus (n) experientiâ confirmatum est; posse dari scilicet, humano generi utilissimam artem, quâ mares feminæve, ad arbitrium generentur. Quòd autem institutis semel Sexibus, insigni robore alterutrum potiri necesse fuerit, indicant plurima vitæ munia quæ non- nisi summis membrorum viribus possunt adimpleri; corporis verò fortitudinem mari-

(a) P. Petit, Med. de Ama- zonis, dissert. Amstel 1687- in-12.

(b) Aristot. Hist. Ani- mal. Lib. IX. Artic. 230. (c) Galen. de Semen Lib. I. cap. 15.

(d) Hippoc. de Nat. puer. Sect. XX. (e) Edoard. Wotton Oxo- niens. de dif- ferent. Ani- mal. Lib. II. cap. 64. Paris 1552. (f) Hippoc. Aphor. 42. Sect. V. (g) Ibid. Aphor. 48.

(h) Arist. Ibid. Lib. VII. cap. 6.

(i) Idem. Probl. Sect. X. Probl. 30.

(l) Idem de Generat. Ani- mal. Lib. IV. cap. 2.

(m) Hippoc. de Dietet. Sect. XX. Sect. 4.

(n) Advice pour élever des Chevaux, &c. par Querbrat, Caliceur, Paris 1666. in-4°.

bus, non verò feminis concedendam fuisse ex se patet. Ex naturali enim mentis ad illa [Sect. II.] propensione ad quæ exequenda corpus est optimè dispositum; mulieres si iis artus torosi lateraque firma fuissent, duris jam gauderent exercitiis: inde catameniorum quibus stare videtur fecunditas, facilis cessatio, fetus intra & extra uterum difficilior nutritio, effluxus & abortus frequentissimi; proles educandæ, quæ vitæ otium exposcit, neglectior cura: sic vano generationis toto opere futuro, nisi Sexus prolem edens, nutriens, & educans idem fuisset. Præterea ex eo quòd mollior & teneritudo corpori muliebri contigerit, pulchritudini via sternitur; puerorum exemplo, qui idè formosi, quòd mollior sit & delicatior habitudo corporis. Hinc enim tunica cellularis tenuiori distenditur oleo, vacua opplentur interstitia, nitidior cutis, lenis humorum indoles & placidus motus, vasorumque minimorum repletio. Cessantibus menstruis, formæ venustas mulieribus, ut plurimum, immutatur; viris ut ad generandum habilitas sic & dignitas servatur diutius. Viden sapientissimam quam Sexibus fecit DEUS bonorum partitionem! Si utrinque virium corporis æqualitas; ex dominationis affectatione discordiæ vix placabiles: si amobus par debilitas, similisque formæ pulchritudo; jam imbecilliores fuissent hominum cœtus, quos aliunde, firmissimum humanæ societatis vinculum, amor non conjunxisset: sin autem corporis robor & forma ad unum simul pertinerent; alterum vilem fore, infelicemque agere vitam necesse esset: cùm verò alteri fortitudo, imbecillitas alteri cum venustate tribuitur; res ex æquo partita est: » societas nonnisi ex dissimilibus atque inæqualibus (a) constare potest, » quos tamen oportet exæquari. Quòd demùm mulierum sibiis major insit sensibilitas, haud leve commodum est: liberorum siquidem prima educatio ad commiserationem & charitatem prouiores exposcit animos; hinc in omni genere animalium in educandâ sobole femina mare magis sollicita est: rei deinde domesticæ, viræque priuatæ tædiosa ut est uniformitas, paucitatem objectorum sensus acutior utilissimè compensat: præterea cùm graviditatis ærumnas, partusque pericula, pessimam adeò conjugii partem, femina sortitæ sint; eas spontè facilius sese irretire amoribus optimum est. Inde fluunt varæ dotes & propensiones cuiusque Sexus propriæ; ruunt autem de alterutrius excellentiâ vanæ quæstiones: neuter perfectus, quòd ex utroque tantum amissitum sit opus: si ex solis mulieribus constaret societas, verendum ne harum eximias dotes, verecundia, commiseratio, pietas, &c. ad vitia usque progredierentur: si ex solis viris, propinqua adsunt melancholia, ferè barbaries, ac ferocitas: at dum communem ineunt confociationem mutuò sese temperant Sexus; affectiones cuique propriæ, rariùs à certo discedunt medio quo constat ordo; naturæque systema omni puncto absolvitur. Phænomena, reique ipsius institutio hanc proinde adducunt conclusionem.

Ergo præter genitalia Sexus inter se discrepant.

DOMINI DOCTORES DISPUTATURI,

<i>M. Alexander-Dionysius Dienert.</i>	<i>M. Claudius-Franciscus Grandclas, Stanislas Poloniarum Regis, Lotharingæ & Barrois Consiliarius & Medicus.</i>	<i>M. Gedeon de Rabours.</i>
<i>M. Carolus Ceille de Saint Leger.</i>	<i>M. Joannes Franciscus Clemens Morand, Regis Societatis Lugdunensis Socius.</i>	<i>M. Laurentius Ferret.</i>
<i>M. Jacobus-Ludovicus Alleaume.</i>	<i>M. Benjamin Ludovicus Lucas de Laurembert.</i>	<i>M. Joannes-Jacobus Belleste.</i>

Proponebat Parisiis EDMUNDUS-THOMAS MOREAU, Senonensis saluberrimæ Facultatis Medicinæ Parisiensis Baccalaureus, A. R. S. H. 1750.

A SEXTA AD MERIDIEM.

Tydis QUILLAU, Universitatis & Facultatis Medicinæ Typographi, 1750.

(a) Aristot.
Moral. Lib. V.
cap. 8.